

香蘇山館詩集

香蘇山館古體詩鈔卷十二

東鄉 吳嵩梁 蘭雪

驄馬行爲英煦齋閣師作

有序

馬性馴而健先生所常御也嘉慶十八年九月
東華門之變先生乘此馬自白礪疾馳百五十
里抵京師甫三十刻賊平馬以積勞而斃先生
賦詩悼之且爲繪圖徵和嗚呼厚矣古來豪傑
之士待時而顯當其混跡於眾粥粥殆無所能
一蒙特達之知授以重寄沉幾立斷志就功成
而退處蕭然若不與其事者卒完大節以享令

名顧所以用之者何如耳先生於一馬之善倦
倦不忘如此況人才乎嵩梁讀而感焉因推其
意爲作是詩

執金吾有千里駒尋常緩步行天衢一朝報國奮奇勇
百五十里來須臾是時

秋獮初迴蹕小醜居然犯宮闕金勒飛從白礪來雷
電騰空四蹄熱縛虎入穴了不驚渠魁一剪餘氛平褒
鄂圖形上麟閣卻恃此馬功先成十萬羽林歸鐵騎笳
鼓春城歡動地驕嘶顧影入長楸汗血前勞渾不記筋
力無多老病催敝帷恩重感龍媒請增市骨千金價收

取天閑八駿才

諸葛武侯祠碑裴晉公撰柳成公書朱蘭友編修
以拓本屬題

事君之節開國才立身治人體用該

語見碑文

武侯曠代得

知己元和宰相河東裴隆中一對答三顧結吳抗魏王
業恢自許管樂實過之陳壽崔浩胡爲哉晉公大節武
侯匹仰瞻祠廟心敬哀爲侯立論正且偉元氣迴幹詞
瓊瑰成公並時贊戎幕楷法上可鍾王儕大書深刻表
貞石龍跳虎卧天間開蜀帥武君本英傑能達治體收
羣材入秉國鈞任軍事其志未就身先摧公傷不死天

意厚力掃浮議專平淮遣將出奇縛元濟雪夜萬騎皆
銜枚克融庭湊復繼討手除大盜如嬰孩君臣一德古
稀覯其謀在斷心不回憲宗得公亦魚水遂平三賊清
九垓奈何晚節奪兵柄奸相逆豎相擠排午橋歸卧願
投老畫像敢望登雲臺幸以名德服夷夏四朝終始恩
未乖柳公立朝並忠鯁豈以翰墨爲俳諧太醫獻箴喻
獨切舞文誅吏法不頽誠懸筆諫有家法殿閣題句薰
風來西明寫經費煙楮乃讓此筆饒崔嵬淮西高文出
韓子書者姓字嗟沉埋碑陰孫樵此繼作響搨亦少松
麝煤二公文翰獨完善大名宇宙常追陪惟侯護持有

神力青天萬劫無風雷

九里洲梅花歌

有序

洲距桐廬縣二十里背山臨江居人以梅爲業
計畝種花可得數十萬樹余欲移家於此自署
爲香田老農足矣

眾香之國不可求九里洲近吾能游洲頭洲尾千萬樹
除種梅花無隙處洲民生長梅花中子孫世世爲花農
但乞種花田二頃不換人間祿萬鍾春意欲迴苞怒坼
雪地花天同一白尋常茅舍竹籬邊寢食惟聞花氣息
花梢遙見富春山積翠浮嵐夕照間其根下透桐江水

一櫂穿花往復還
花開花謝梅結子
家家笑語花陰裏
此間便是桃花源
飯熟胡麻吾老矣
老犬性僻耽梅花
平生願以花爲家
曾尋鄧尉攜吟屐
曾入西溪弄釣槎
羅浮前歲清游失
仙夢低徊難再覓
石谿歸卧春風顛
索笑巡檐能幾日
一窗雪意夜三更
薄宦天涯百感并
移家終踐香田約
飽看梅花過一生

賺菊詩戲呈趙象庵舍人并邀查梅舫廷尉李鳳岡太守魏春松農部秦敦夫編修同作

蔗山學道人種菊亦偶寄花事乃獨佳頗以盛名累九秋方大開游者塞車騎主人卽未開圍扉不容閑我家

比屋居一日嘗三至偕行翫佳色獨坐領幽味吾婦攜
兩姬昨連花下襜賞心有奇葩歸來猶默識乞贈多凡
姿拔尤慳破例遂以望蜀奢竊效襲秦智斗酒幸可謀
賺花出奇計矯命紿園官拜嘉遣雛婢白雲天外來英
英照庭砌玉貌果傾城高壓羣芳隊置之閨閣閒澹與
琴書對蓓蕾含詩香枝葉得畫意始知天地間萬物皆
公器契合洵有真殊珍詎終祕況乎性情交蒞蘭原一
氣投分二十年結鄰今始遂持彼霜後英匹我林下致
離垢卽神仙同心宜伉儷求賢須及時貯嬌須得地此
花如解語應墮感知淚吁嗟名利塲所歷厭機事僻性

孰冷花奇謀姑暫試麻姑本少年擲米等兒戲座有王
方平未免笑狡獪倖獲茲已多割愛後難繼人我願兩
忘爲花同一醉

陳氏雙節詩學庭助教屬賦

嗚呼吳孺人事夫方盛年閨房之寵非所專爲夫納媵
嗣乃延嗚呼符孺人夫沒願從死死者已矣生奈何視
此熒熒兩孤子上報所天下存孤白頭一心誓不渝兩
人生死天扶持

一子未脫懷一子甫過膝成立未可知不教悔何及出
就外傳讀父書入聞母訓涕泪俱子也承懽孫述德孝

友之家貽慶澤陳氏有先塋距家八九里爲夫謀窀穸
吾事粗畢矣嘻嘻出出妖鳥呼火光三匝周吾廬反風
撲火火神避積券一擲蠲夙逋家雖中落力匪紓敬宗
收族恢前謨嗚呼兩孺人志節今所無

秋堂聽雨圖許青士編修屬賦

圖爲杭堇浦先生
官翰林時作題詩

者七人其一卽編修
大父靖岩先生也

萬人海裏屋數間一主六客相對閒秋意颯然在庭樹
片雲挾雨來西山雲斷山青如潑黛簷瀑千條瀉清快
芭蕉聲重荷葉疎迸入秋心都破碎是時玉堂清暇多
覓句能傾金叵羅豈知高會後難繼風袂一判俱山河

聖朝恩重酬無地翰林慷慨陳封事願爲李白拂衣還
不共陽城邀客醉西湖烟月屬臣家乘興曾浮南海棹
快意飽餐惟荔子清游忍凍爲梅花座中當日論詩友
靖岩丈人親且舊攬勝重登越秀臺懷人屢載羅浮酒
痛飲高歌能幾年人間富貴總雲烟四朝耆宿風流盡
三絕才名翰墨傳君家兄弟推眉白繩武才高能述德
紅燭修書領列仙青山話舊思先澤昨夜秋堂雨又成
對床蕭瑟感平生江湖夢斷吾頭白篷背銷魂足此聲

醉石先生歌爲吳玉松太守作

陶令一醉亦千載有石兀卧今廬山先生自署義焉取

寄託儻在義皇間公田彭澤復何有詎肯折腰因五斗
拄杖高歌歸去來葛巾日漉東籬酒先生拔士多英奇
門墻玉笋生孫枝先生論事斥權貴諫草雖焚天下知
一麾出守爲循吏民隱周知事無廢酒酣徧倚雙芙蓉
石丈頽然亦同醉郡解疊石爲二山甚奇秋風忽起思蓴鱸徑攜
釣艇歸三吳鬱林宦橐無長物柴桑乞食眞吾徒山塘
七里連臺榭艷舞清歌朝復夜先生只愛逍遙游風月
天然美無價不肯佞佛不事仙何況問舍兼求田飽看
虎阜花千樹卻借人家屋幾椽樓上青山樓下水尋詩
日在花光裏柴門深掩避公卿團扇畫圖傳士女北海

寶朋河朔游持似先生恐未侔

太守嘗欲合祀陶元亮孔文舉嵇叔夜於一室

而不談朝政不臧否人物於陶爲近非孔嵇二公所能也

身外功名皆糞土胸中水

鏡自陽秋先生有子真雛鶴不以高情縻好爵官袍笑

脫昇籃輿靖節當年無此樂

哲嗣萬人學士亦將乞假南歸

出處平生

與細論會心隨地有桃源願移九里洲前櫂來共花天

酒一樽

書吳鳳白同年滕王閣考後

貞觀介弟分桐圭滕王閣建章江湄不聞勳業著屏翰

但以歌舞供酣嬉重陽高宴主者誰閻公繼此持旌麾

帝子繁華春夢斷元戎名字白雲知

都督閻公史佚其名

十三童

子天下稀綺筵對客霜毫飛

子安麟德初登第年十九上溯龍朔三年至顯慶三

年當得十三歲

風帆一飽借神力江神萬古生雄姿才高可惜

不自斂名盛從來多數奇異日海天太漂泊落霞鬼唱

猶歔歔吾宗爲政有餘暇讀書妙若金沙披道眼早空

雲霧障匠心自鑄瓊琚詞作序之年定顯慶開藩此地

推永微遂令傑閣益增重後先作者無傳疑壯游我亦

感嘯昔盛年意氣山可移題詩自喜壓平甫撰記上敢

摹昌黎故人一別散如雨綠鬢卅載今成絲

乾隆癸卯冬余自河

南歸江西甲辰春應召試將赴金陵諸公餞於閣下年甫十九

凌雲豈有上林筆抱琴

只與空山期愛君稽古有高識爲君話舊慙吟髭歸舟

昨夢渡江去西山濃翠霑春衣

汪貞女詩

妾身未從夫已受曹氏聘夫行縱不歸安忍適異姓翁
書離郎婚婦生亦何爲父命守吾義女死猶可遲樓居
二十年潔身奉甘旨從一心皎然送終事畢矣生以竭
吾孝死以完吾貞嗚呼汪氏女豈求身後名

題何子真詩卷

愛書實愛我養詩如養花

集詩中句

其言有根柢所慕非聲

華以汝性篤厚發爲詞滂葩冥心入蚊睫赤手拔虎牙
正色掃浮艷正聲斥淫哇游山當造巔泛海當窮涯寶

汝萬金璧琢磨淨纖瑕吾期子真子不獨詩名家

崇效寺海棠歌

香刹五朝花十丈天與詩人作供養麗質原生淨妙中
仙才自拔雲霄上前日我爲探花來嫩寒小勒紅初胎
暖風三日花怒放直以錦繡爲樓臺高枝插天橫卧地
半含半吐尤風致晨霞艷艷明欲燒午酒騰騰倦猶睡
梨花相對偏有情澹粧微笑能傾城其餘黃紫各殊態
至此羞澀難爲名老夫愛花如蛺蝶繞樹百巡狂未歇
纔有嫣紅點袖梢預愁泥泥燕支雪斜陽照耀忽生姿
重傍花陰立少時相思莫待春歸後卧看屏風畫折枝

再過崇效寺看花

昨日看花紅滿枝東霞西日生奇姿
今日看花花漸白玉容退酒嬌無力
春光九十風雨多紛紛艷雪埋青莎
明日看花當奈何

題鄭紀薌再生圖

作令侵官錢九死有餘責不忍累民死亦甘此心耿耿
天應識良友急難民輸誠卽此可驗君平生國恩高
厚酬無地願君世世爲廉吏

送陳秋舫殿撰典試廣東

與君定交初乃在下第年文章有真氣不以利鈍遷及

君撥大魁我聞喜欲顛高才應
昌運遇合非偶然今
受

特達知親執貢舉權平生稽古心積蘊期一宣嶺南況
文藪奇秀鍾山川君往拔其尤當爲海內先取士貴根
柢報 國求英賢請量玉尺才歸奏金鑑篇

送程春海編修典試四川

平生不願萬戶侯但願載酒一作凌雲游何況持衡典
文字山川秀傑資冥搜蜀產自昔多俊英相如太白皆
挺生一作貴郎一供奉致身偏未由科名天於子瞻意
獨厚永叔一見心先傾始知特鍾有間氣慧福曠世難

爲并君文華國遇亦奇給札新邀

聖主知青天萬

里秉龍節正是才人吐氣時天半峨眉峯上有太古雪
化爲錦江江水流千里澄清鑒毛髮君將此水洗雙眸
皎若明月懸高秋珊瑚十丈鐵網收異采照徹天西頭
乘傳歸來覲 丹陛賢書一奏

天顏霽盛名豈必俱蹉跎請看鳳翽展卷阿

王晉卿剔耳圖爲梁茝鄰儀部作

萬物之患先有身兩耳善聽尤紛紜三日病聾亦何礙
癢不可耐笑且嗔軍中出入將家子陷胸截脰尋常爾
限以三日疾去矣不然大呼割吾耳東坡語妙不可思

晉卿疾除能預知勿藥有喜驗亦奇禪家棒喝神乎醫
吾耳充塞偶同病挑剔先妨擾吾定君持此畫邀以詩
一笑居然耳根淨丹術無靈詩有權吾生苦樂循自然
此心能治百病蠲萬蟻酣鬪吾高眠

送賀藕耕贊善出守南昌

經世必遠畧其源出詩書國家盛人才先以館閣儲賀
君曠時英早值承明廬講學務根柢立身勵廉隅昔秉
三晉節造士惟經腴至今門下士端恪無異趨

聖朝簡良吏所用多醇儒練達須親民以君領郡符南
昌都會地風化資轉樞事上輔以正育下矜其愚潔已

率僚屬防奸先隸胥庶幾教養兼而令民氣舒況聞今
大吏道義相匡扶牽制苟無患惠澤當有餘願君持定
力始終志弗渝仰酬

特達知俯庇吾桑榆

送戴春塘觀察分巡鳳陽

盛代貴經術大吏多儒林求治有本源臚仕非所欽戴
君稟天秀其學湛且深廿年厯華要澹泊如青衿昨秉
使者節觀察皖江潯備兵權稅兼

帝曰惟汝任三郡領雄關九省通驢琛自非吏守法安
見民歸忱公以敏練才持此精白心仁風被草木誰忍

爲欺侵並聞富歐陽繼美古與今大雲覆萬物所至成
甘霖我乏經世具與俗羞浮沉引疾念投紱一榻依棠
陰贈行頌高義敢云寓良箴惟公鑒誠悽別酒爲再斟
孝女陶瓊姿割股詩

母病不可瘳女生何所恃割腕有奇徵請以女身試女
心知有母不復知有身其身不自有腕肉何足云雞蘇
海上方雜以魚鮮進力盡天儻迴不然以身殉阿母病
在床沉沉夜三更不見女侍側但聞喚燈聲阿翁攜燈
來見女驚欲絕慘慘眉上霜泫泫腕邊血問女何所事
嗚咽前致詞割腕願救母母令阿母知初持金錯刀右

股割寸許墮地覓已無再割兒左股阿父聞女言憂女
戕其生女痛佯不知但乞嘗兒羹母言羹味佳一啜神
已王大孝天扶持女身竟無恙阿父爲我言女時年十
三至性已如此所恨生非男女今賦于歸善承舅姑志
阿壻能讀書當以科名貴丈夫有偉節匪徒貴科名請
看陶氏女早被

天朝旌

題黃樹齋游廬五少圖

五老皆奇峯五君皆少年與我締石交皆以文字緣我
年十八歸故鄉穿雲路出廬山背雲中一飯失青山但

聽松風答寒瀨浮生萬事如煙雲朱顏那得常青春卧
游兀兀三十載舊盟纔許尋匡君青天布水七千丈探
源更出青天上石梁三峽俱仰觀李蘇不及吾游壯王
君愛我廬山詩要以身踐窮吾私九十九峯陟未半已
詫造物難端倪若從絕頂下攬雲瀑態千變應信吾詩
未足盡發茲山奇我與五老暫別又七年一游石碧一
麻源從吾游者余一與李臣收踏月冒雨皆詩顛一賦凌
雲氣千尺黃生來作計偕客徐東美艾中文高數獨奇同
話仙山惟太息老夫腰腳幸疎頑勝游欲再憂緣慳終
須結屋黃巖下卧看廬山不出山

楊簣山比部邀賞桂花

江鄉老桂動千樹京師致此道阻艱一花纔破香透屋
經旬未許圍扉關主人愛客出佳釀中庭敷坐花四圍
時有奇芬發清悟杳若風露生深山此花秀特異羣木
骨性似不宜人間何爲孤根寄盆盎未免志士摧心顏
吾將移汝驚峯頂雲霄萬古相追攀始信仙才邁眞賞
花時一醉緣非慳

朱芝圃觀察海上受降圖

閩粵之交多劇賊以船爲家水爲國前明籌海有遺編
制勝僅聞胡與戚

熙朝治化敷寰瀛何物么魔猶竄匿旄節庸臣孰養癰
樓船飛將能摧敵斬刈終非

聖主心征輸尤愛疲氓力遂令大吏布

恩法許以游魂貸鋒鏑其年己巳月孟冬浮天巨浪排
艤幢降書三至議未決萬命危疑呼吸中使君坐鎮殊
雍容周防要隘如金墉先送妻孥銷叵測後移礮械收
全功雷霆戢怒膏雨濃留者入伍歸爲農感悔稽顙淚
涇胸赦其已往寬脅從歡聲

萬歲騰呼嵩是役功成速且鉅實由渤海循聲著不然
進退失機宜此身一擲成孤注使君親賦紀事詩自信

平生惟直愚惟直與愚眾所諒虎狼蛟鰐皆潛乎祇今
瀕海安耕漁民死不忍操戈及嗟彼巧宦端避趨國家
緩急將誰需願君持此心不渝出擁旌幢入秉樞坐令
四海皆康娛後有繼者觀此圖

讀書人家第二圖爲春松先生作

先生由刑部出守揚州承

召對詢及家世奏稱累葉俱入庠序上曰讀書人家也出而榮之繪圖以紀今將乞歸作第二圖

聖朝貴儒術致身先讀書其學體用兼義理爲膏腴一
受

當亡知結蘊平生舒上者

君心格下焉民病蘇不然甘賤貧著述方自娛萬卷養

吾性萬物周吾廬嗟彼執袴子生與利祿俱華屋沸管絃青箱棄榛蕪豈知天下士超然古爲徒身心苟無媿出處皆有餘不見魏先生舊隱瀕西湖

天語詢家世幽居傳畫圖

先生儒者宗家學早能繼玉堂無此才乃以觀政試十載專西曹侃侃執名義斷獄惟引經妙得法外意一麾領外臺所至著清惠練達識既高盤錯器逾利袖中一卷書儒林與循吏心希古人風身任當世事故鄉豈不懷報國念殊摯改官亦偶然憂樂關大計湖上屋數椽兒時授經地夢中牕雪深青燈有回味

古稱三不朽其一爲立言所言在經世匪以文字論與其惠來學曷若用及身一書洞民瘼四海銷煩冤先生改農部職掌司錢緡獨憂吏爲奸擾累矜吾民朝命擢臺諫夕疏排

天閭保赤滌其蠹治獄清其源

帝曰達政體庶幾風化敦遂使著爲令中外推

皇仁紀綱有由立案牘毋滋繁此非經術懋安識吾道尊

雪意融早春眾芳有消息益梅亦已花照我一窗白高軒昨見過釣游話疇昔慨然思故山戒行在晨夕示我

第二圖承家溯先澤

恩知被

三朝敢忘稽古力
涓埃報已難桑榆計良迫歸耕卽無
田課兒乃專責大節陽道州清門鄭通德朝野望所歸
去留公自擇嗟余學久荒投老歸未得終擬從公遊桐
江買鄰宅

顧南雅學士滇南紀勝圖

滇南萬里天盡頭秦漢以來誰壯游
諸葛勳名久寂寞升庵著述皆窮愁
洱海之水蒼山雪金馬碧雞爭映發
地鍾間氣育才多天遣鉅儒應時出
使者身執造士權

目光如炬心澄淵要爲朝廷植楨幹特以道義相磨礪
健筆摩空文似綺醕粹先從六經始山須陟頂水尋源
吾儕講學原如此旌節年年往復來知君選勝卽掄才
三迤洞壑扶筇遍六詔風雲擁傳迴老梅艷發唐朝樹
蟠根下有雙龍護門生載酒及花時應念醉翁行樂處
教澤如今被百蠻雲泉常在卧遊間猶嫌奇境搜難盡
夢繞鴉飛不到山

六月廿四日黃霽青太守招集淨業湖觀荷

荷花年年有生日載酒幾人爲花出但解看花亦俊游
何況酬詩盡仙筆先生花下尋前盟約我明朝破曉行

誰知一夜傾盆雨飽聽虛檐瀉水聲荷花得雨開多少
淨業湖邊紅不了雙屐衝泥笠戴星我比閒鷗起還早
先生招我湖上樓樓下西山翠欲流玻璃十里拓舊鏡
美人新浴看梳頭我是蓮花前博士鑑湖一曲供遊戲
賀監金龜酒不賒放翁團扇詩能記今日啣杯忽泣然
爲君醉倒萬花前花時不見梧門叟詩夢低徊三十年

法學士居
與湖近

題霽青太守城南吟社圖卽送赴任高州

人才萃京師擇交貴求益論詩雖小技風雅有正則吾
儕抒性眞所尙匪雕刻欲觀醞釀深先賴琢磨力北地

多苦寒雪花大於席高歌動鬼神藉以銷永夕諸子皆
俊英使君更超逸長城五字攻驍將萬人敵銳意當真
搜枯坐但屏息佳句破空來山飛水能立以我駑鈍姿
躡彼驕驕跡振鬣時一聲風雲黯無色猶記乙亥冬星
奔我期迫呼困庸奴隻身墮叢棘君來釋重圍俾我
定歸策謂我才太奇盛名致窮厄慰藉荷再三執手共
嗚咽別君歸五年營葬事粗畢庚辰過信州故人展良
覲開尊月正圓落梅風又急君歸亦無田服除今再出
一燈照華顛百事感疇昔社中十三人宦途半分轍恃
此素心同不以榮悴易陶侃

雲汀中丞

督八州其才可經國

繼者胡

墨莊廉使

周

肖廉觀察

梁

莊鄉觀察

門皆列金戟臺諫陳昌言

董夢南侍御

度支參碩畫

錢衍石農部

吾鄉陳

石士司業

與謝向亭學士衡

文操玉尺李翱年最少

蘭卿侍讀

樞庭乃先入人事各拘牽

嘉會頗寥闊朱子復居憂

蘭友庶子

劉郎已前歿

英初編修聚散

愴鷗羣光陰送駒隙我非用世資豈有著書筆忍飢但

長謠來者將焉述君佩郡守符救時念尤亟

九重問瘡痍百蠻待膏澤願收山谷名茂著潁川績由

此詩教昌上與古人匹入

觀會有期彤廷伋旌節吾當倩伯時重繪西園集

伍雨田明府南轅訓練圖

項羽將兵破秦地鉅鹿之名天下知國家承平二百載
吏民無事方恬嬉黃巾妖賊亦何有一朝斬刈如雞狗
當其驟發詎能防三輔毗連皆盜藪游魂暫貸囹圄中
密與外賊爲交通撲滅不早黨且盛厥勢將與燎原同
伍侯下車政新舉先事綢繆當未雨亟除稂莠殖嘉禾
要憑禮義爲干櫓陣雲壓壘烟塵生風鶴傳聞夜屢驚
千騎可將無勁旅百雉可守無堅城侯也慷慨投戈起
城存吾生失吾死憑將碧血濺沙場先散黃金募壯士
壯士感激來田間戰陣平生豈素嫺爭看刀光如潑水
始知軍令重於山出持矛戟歸荷鍤以農寓兵原古法

緩急相依如父兄忠義之師無勇怯官能衛民民衛官
官聲所被賊膽寒可憐眾志甘同殉誰料孤城此境完
侯也痛定思前事寫人生綃餘涕淚去日猶懷保障恩
凌烟誰畫循良吏我識侯貌只恂恂翻訝民間頌若神
從知惻惻無華者卽是安危可恃人

次朱文正公韵題崇效寺所藏青松紅杏圖卷

人天一現優曇花世間草木紛凡葩青松紅杏亦偶寄
香南雪北皆吾家田盤山色此無恙古寺久矣棲青霞
百年妙蹟牘詞翰幾人密諦參雲伽閒鷗我愧侶鸞鶴
故交歲厄哀龍蛇

謂公及
覃翁師

圓覺但能得三昧才藻未須

移八义連朝紅艷賞都勝明日綠陰生昔耶祇園賴有
兩仙樹一棗分嘗侯道華

謝魏春松先生惠題拙集

才人年少矜時名志士暮年常撫膺得一知己死不恨
此淚乃爲千秋傾吳生浩歌三十載意氣當年狎湖海
蘇齋一叟歸道山壇坫蕭條誰健在一麾公昔來揚州
江東移節明湖秋七十二泉六朝樹惜哉我未從公游
怒濤滾滾趨淮北高岸如山水不圻幕府行觴樺燭圍
與公同作將軍制謂松客出岫孤雲上水船京華薄宦兩
華顛盡搜行篋詩千首各話飄蓬事十年十年人事增

衰醜憂患餘生莽回首廬岳狂吟太白詩羅浮夢載東
坡酒江山烟月資清真公許論詩若有神肯將虎卧龍
跳筆貌取郊寒島瘦人吾儕樹立先根柢縱以詩名惟
一技自信猶無鄭衛聲年來頗挾幽并氣西山昨夜雪
嵯峨門巷天寒少客過感知一和陽春曲只恐焦桐苦
調多

題春松先生馬塍種花圖卽送歸杭州

馬塍公故鄉寄園公所寄種花三十年去住關榮悴我
寓與公鄰買花常入市四季栽培費苦心況是平生釣
游地好風計日放歸槎紅徧西湖賣酒家惆悵寄園手

栽樹春深猶有未開花

題趙管翰墨和鳴圖爲許真生編修暨項親卿大

人作

蓮花莊裏花爲屋日就闌陰寫修竹林下風流似此稀
人間佩褱俱庸福一聲白雁換山河露葉烟枝暗淚多
輸與清時賢伉儷玉臺雙管替鷗波

劉松嵐觀察年七十矣比自懷州入都喜而有贈
車笠之交三十年昔皆壯盛今華顛君爲大吏清且賢
我以詩法相磨鐫花時曾泛金闥船乘興遂陟靈巖巔
洞庭萬頃浮蒼烟君有名姬淑且娟爲我手繡新詩篇

春雪弓衣無此妍一別萬里心茫然長白積雪千峯連
念我飄泊歲屢遷蛾眉太息飛吟箋康山再見喜且憐
浩歌醉倒梅花前留我大被同高眠三晉幾日揚旌旃
浮雲富貴一笑蠲腳底太華開青蓮故鄉可歸苦無田
懷州徑買屋數椽愛其沃土兼清泉手栽萬個琅玕圓
縹緲之閣臨三川自營生壙將終焉結鄰有約吾屢延
惜哉買山無俸錢一筇雙屐何翩翩意外昨忽來幽燕
骨肉之愛文字緣論詩話舊增纏綿嗟君七十車久懸
會合如此寧非天晬盤計日開華筵商瞿五子方蟬聯
況有著述千秋傳謨觴洞室琅嬛編吾儕大笑皆僊佺

服食何必求神仙

張茶農解元爲余作九里梅花村舍圖再用前韵

自題其後

梅田二頃吾何求梅花九里先卧游花開知是誰家樹
占斷江山最佳處畫中人住此山中頭銜已自呼香農
高寒縱似孤山客曾爲梅妻愛獨鍾瓦瓶昨夜冰紋坼
寒壓重衾窗未白夢到桐江江上邨南枝預報春消息
山外梅花花外山萬花園住屋三間冷粘拄杖穿雲去
香透吟鞋踐雪還隔江遙見天隨子招我山光花影裏
縱飲同傾老瓦盆狂喚樵青吾醉矣故園亦復有梅花

爲愛嚴陵此處家鶴俸能分容買屋鷗波相近易迴槎
富貴神仙誰得失咫尺神洲路難覓紅衣愁煞拜花人
白髮未成偕隱日息壤前盟豈再更結茅況與故人并
明月一鋤雲半榻花前唱和足平生

余舊作弄梅圖餽
覺翁近有結鄰之
約

李蘭卿侍讀得樹根肖東坡赤壁聞笛小像十二
月十九日爲公作生日供此賦詩

老泉曾記木假山妙以盤錯爲孱顏何時忽化子瞻相
乃在黃州山水間危磯兀坐俯千尺江上有人夜吹笛
前後兩賦俱俊游難得誕生逢此日青巾紫裘來翩翩

再拜但求詩一篇郭古二生亦同賞姓名皆得因公傳
李委母乃君前身結此千秋文字緣我爲賦詩公欲笑
南飛一鶴仙乎仙

是日再題羅兩峯坡公遊跡畫冊

公生六十有四耳瀕於死者常八九公死迢迢七百年
年年生日爲公壽今人何必非昔人讒忌全消公論伸
冗士當時無著處詞壇俎豆此常新公之師友多吾鄉
廬陵居士雙井黃蓮花世界三杯酒爭及梅花一瓣香
連日花開逢快雪比似雪堂更奇絕恨無紫裘腰笛人
山石一聲吹盡裂兩峯畫筆傳公神笠屐風流尙逼真

展圖忽漫增惆悵我愧蘇齋得髓人

是間爲曹谿師所贈

鮑覺生通政招集陶然亭用曹玉水舍人韻奉謝
野人胸中一事無讀書惟知愛莊列蕭散常爲物外游
招邀況展登高節主人鮑照今所推客也匡鼎詩能說
窮年刻楮苦用心閉戶造車出合轍攀躋地勝得林榭
休沐身閒謝朝謁連朝黃菊花正開昨夜青燈蕊先結
載酒能攜吟侶來出郭早知市塵絕虛廊曲檻開畫圖
筍味茶香入禪悅萬頃蘆花烟水遙百年老樹水霜閱
寺門向背耐追尋溪路淙潺喜迴折新雨一過山更青
白鷗幾點飛成雪放眼纔知天地寬憂時底用肝腸熱

與君投分三十年壯盛駸駸變衰鬢立朝風骨久嶙峋
餘事文章猶綺纈歷落今成可笑人禮法豈爲吾輩設
屐能幾兩著平生我味斯言最親切花前痛飲三百杯
卧看西山日西映

謝顧南雅畫蘭雪圖

謫仙佳句畫者誰先生妙手偶得之雪中貺我一橫卷
有聲畫寄無聲詩先生畫時天未雪硯池粼粼冰尙活
勁葉疎花一兩叢但隨筆意爲波折天女何來忽散花
簷前竹樹響沙沙生香迸入湘毫杪冷豔抽成綠玉芽
墨氣空濛半烟水雪裏花開澹如此六法何論陳白陽

趙家子固神來矣我愛先生畫絕倫性情高逸如其人
先生愛我詩徹骨謂與其畫俱通神牡丹富貴驕青春
開紅如海飛車塵獨以冷澹傳吾真空山臭味平生親
歲寒歸卧桐江濱老屋梅花來結鄰

貴貧西侍郎藏馬湘蘭硯彭春農祭酒藏湘蘭印
章鍾仰山學士以爲兩美必合未知誰歸鮑覺
生通政云渠亦有湘蘭硯當并以歸之予請決
以枚卜以息眾爭用東坡仇池石韵同作

湘蘭工畫蘭門掩秦淮綠名硯與佳印鑒賞平生足二
石未剖初委棄在巖腹既成而奪之未免蛾眉蹙當時

諸名流尋春幾杜牧朱墨偶一酬未敢再三瀆身後鄉
澤存觸手皆良玉今昔互主賓盛衰爲倚伏三人占誰
從以詩代枚卜尤物但有歸窮寇何須逐君才大如海
君心虛若谷得失能兩忘人我從所欲浮生此暫閒何
事擾心曲有酒爲解紛明朝來不速

臨頓新居圖爲潘功甫舍人作

有序

臨頓新居圖者功甫舍人屬其友張茶農解元
所作居在臨頓里之鳳池鄉國初爲顧氏鳳池
園今曰養親園尊甫芝軒先生以大司農乞歸
侍養於此因取杜詩養親惟小園句名之余與

先生交在紀羣之間遊從籍湜之後比又與功甫同官西掖唱酬甚歡明年春封公雲浦先生八旬雅壽功甫將歸覲稱觴先以此圖屬題輒呈古詩四章以抒積慕兼志別悰

林壑表遐寄菽水關至情仰事苟不足進退皆虛名藹藹尚書公晨夕念所生弱冠擢上第中歲辭殊榮入陳經國謨出秉造士衡養志三十載猶云愧躬耕乃營十畝宮侑以三疊笙飄然歸故鄉富貴浮雲輕

所居在金閶三吳擅雄麗花月窮冶遊山海萃珍異畫樓臨水多別館連雲邃燕處豈不優豪華後難繼誰知

澹岩人別選承歡地園林拓舊觀池榭出新意營巢燕
泥溼出谷鶯語脆喧寂人境同餐霞自高致

峩峩臨頓里昔爲顧氏園主人已數易爽塏基尙存念
以堂構美稍酬顧復恩栽花望穎發種樹培本根茲鄉
名鳳池飲水思其源白雲捲爲瀑丹穴今生孫平泉守
佳植綠野開清尊名德以爲寶游觀非所論

賤子坐春風俯仰三十年題襟竹林始謂令伯祖撰杖

桐橋邊

翼寓虎邱雲浦先生每攜功甫過訪

冷宦愧簪筆幽事懷林泉鈞

衡早乞養衰冗遲歸田吾子幸同社雪夜句屢聯行稱
履道觴歸泊胥門船天才紹家學地勝因人傳願以三

世交締此千秋緣

南雅惠貽獅石菖蒲先以詩畫次韻奉酬

枯坐雨窗抱書策故人貺我飛來石佐以菖蒲九節花
蓬島仙雲同一碧此石兀卧今幾年搏象之力天爲旋
苔岑氣味相忘久誰識安期亦散仙

孫秋士種紙山房圖

先公手種慈恩樹霜葉如花落無數一窗燈火透秋陰
阿母當年課兒處連枝榮悴幾經年老屋東西化暮煙
腸斷石闌題句日丹黃滿地是吟箋

題張詩舲舍人除日編詩校射圖

人家萬事迫歲除君以講藝方自娛兩石之弓一枝筆
三百六句無曠日知君論詩通射理正鵠先求反諸己
一發命中傾廣場得意揮毫亦如此詩成痛飲開華筵
畫圖明日人爭傳我出韓門三十年雪霜冉冉侵吾顙
慚愧攻詩亦云久曾是當年射雕手覃谿師每稱余詩爲射雕手老
去頽唐百未成欲酬知遇今何有展君此畫讀君詩自
笑屠蘇飲太遲卻以登臺爲避債西山也有借來時余近有避債難求空闊地借人亭子看西山之句

送陳芝楣別駕之官滇中

春波揉綠花照天與君同泛西湖船落葉打門霜透屋

與君同賞東籬菊

京師近事

人生聚散如沙鷗風襟一判今

十秋相如入貲豈初願士元之官真壯游滇南自昔誇

雄麗前後故人持節地

謂顧南雅吳巢松陳午橋諸君

普洱之海飛怒

潮點蒼積雪無時消優曇花開紅十丈花光迸出青天

上君行先抵文德關匹馬崎嶇深箐間飛雲巖與牟珠

洞可惜探奇吾不共碧雞金馬望迢遙萬里懷人酒未

銷願看諸葛銘銅柱莫倚玉褒賦洞簫

香蘇山館古體詩鈔卷十二終

香蘇山館古體詩鈔卷十三

東鄉 吳嵩梁 蘭雪

述感卅韻贈朱虹舫學士

夫子故淹雅所學無不該偶出其緒餘盧扁相追陪我
年將六十其氣未肯頽狂歌文酒場跌宕兼談諧無端
感時疫頃刻成奇災僵卧十餘日痛苦肝腸摧一息尙
苟延身心皆死灰預敕身後事妻兒泣床隈醫者若聚
訟下筆仍疑猜咸言用參苓庶幾元氣迴君獨斥浮議
謂此火所煨制以苦寒藥如雨潤枯荑猛劑再四投生
機瀰靈胎呻吟漸有知收淚爲歡咍觀者咸太息君膽

真壯哉惟君有定識任重無旁推此役如澶淵所恃一
寇萊酣戰歸帳中鼻息聲若雷具此回天力當爲活國
才使之秉鈞軸萬物荷栽培連朝風日和爛熳園花開
爲君倒家釀勸君注深杯交君二十年緩急賴決裁轉
思病危日痛定生餘哀祝君大富貴不若祀高禴連舉
五男子玉樹多奇孩我老且益健兒孫相往來當令誦
我詩聊以娛耆齡此時居斗室送君尙徘徊何日縱闊
步泥首君庭陔約君看西山去陟城南臺

枕上放歌

世間怪病那有此風劫火燒淪骨髓擲身鼎鑊煎熬中

僵卧淡旬不能起嗚呼此時但求死安能區區戀兒女
有人橫空潑秋水徧體清涼吾醒矣一揩昏眼看南窗
竹影茶煙皆可喜藥力如此真奇才名以將軍誰負汝
始嘆遼參徒盛名庸醫殺人多誤使國家承平用此輩
亦可恩榮保終始一朝有事繫安危焦頭爛額俱披靡
豪傑天教應運生唾手立功快無比不然投絃歸田間
一笑公卿真脫屣奈何束縛馳驟之成敗因人良足恥
思之爛熟忽長嘯竟欲飛騰八千里多事猶嫌黃石公
御氣惟尋赤松子可憐宛轉床蓐間猶聽藥鑪聲沸耳
從今悟徹萬緣空心死身生參妙理世法如雲總不知

但愛希夷長睡美

懺悔篇

天旣生人具人理聖賢仙佛一而已生老病死只尋常
如水成冰冰復水世人擾擾不自知爭名於朝利於市
埋頭終日湮性靈失足公然壞倫紀吾儕空讀萬卷書
但覓科名求祿仕口談王道心市傭得失營營真可鄙
朝廷用人貴得人沉毅能肩天下事出處支離不可論
碌碌終身安用此別有奇才間氣鍾臣爲忠臣子孝子
遇事敢言身敢爲海內皆知公俊偉水旱盜賊無時無
能竭吾心病終起立朝不肯樹私恩失意何當叢眾毀

扁舟歸卧午橋莊功業依然載青史嗟余老矣無能爲
只以新詩銷塊壘虛享才名四十年心血無多存敗紙
所愧匡時一事無暗淚霑襟汗流泚何況平生罪戾多
大半意淫兼語綺結習年來痛掃除肺腑空明差足喜
但願來生再補圖聊爲今生雪慙恥因果茫茫未可知
聽其自然斯已矣

書鮑覺翁詹事詩後

海內論詩推鮑子其才與法能相兼千篇富麗俱百鍊
一字矜貴當雙縑沉思每覺鬼神入歛氣欲逼冰霜嚴
下里妖淫滌先淨中原盜賊威能殲運籌慘澹在帷幄

用兵變化資韜鈴亮節一聞鼓聲壯寒芒四射戈鋒鉅
清新由來出庾信超妙亦復希陶潛高骨直追韓吏部
逸氣或參蘇子瞻有時弄筆仿吳體偶然託意收吞蠶
楊柳姿多拂春水芙蓉艷絕迎晨暹此皆讀書善鑄鑄
遂使諸病銷鍼砭嗟余格卑豈君敵低頭東野常爲謙
終然海岳讓雄闊清泉怪石徒纖纖心力年來況枯槁
白頭才盡成江淹昨抱沉疴九瀕死君來省視舌屢磬
連朝薄粥漸能飲夢魂稍稍歸安恬十旬靜養當再出
酒樓去約尋青帘西山涼翠撲衣袂爲君一笑花重拈

書賈稻孫詩後

賈生湛經術能作詩人詩論古有特識傷今多苦詞青
天下雷電紫海騰蛟螭其窮乃徹骨畢生無展眉同時
黃仲則才實曠代奇盛名動卿相多病摧瓊姿君常與
唱和魄力乃抗之奈何當世士不聞人賞咨荒江老屋
中埋此筆一枝君友汪容甫其子曰孟慈爲君刻遺草
生氣猶淋漓我時方抱疴讀之增涕洟書此於卷尾君
乎知不知

讀蔣藏園先生詩書後

少陵自昔號詩史特以序事能淹該傳至我公乃極盛
錯綜變化工鑪錘當其沉思忽孤往荒山廢寺松聲哀

生氣鬱勃光怪發神驚鬼泣人疑猜不知腕底有何物
落紙但聞冰雹雷臣忠子孝婦貞烈堂堂志節人交推
使之紀述但公牘意象黯淡如寒灰發揮乞公大手筆
乃以天地爲昭回經世偉畧惠民政祠碑墓石高崔嵬
曷若得公一詩出無隱不達堅不摧京師風俗侈且麗
淫巧之技鳩所媒公摹其狀醜畢露創懲之旨何嚴哉
揚州巨賈富敵國公唾叱之等輿僮儻有義舉亦歌詠
火坑坐見青蓮栽天下江山勝絕處公戴大笠扶筇來
白雲鋪海瀑傾峽幽險鑿透山爲頽偶替窮交寫胸臆
竹爐茶銚燒芋魁其聲往往雜歌哭誦之涕淚前樽壘

此非讀書破萬卷何能御風凌九垓平生志行古豪傑
詞賦不樂攻鄒枚玉堂一入冷於水此筆下降爲優俳
扁舟奉母掛冠去講學吳越士氣培一日盛名動

天子徵車再出羣公催方謂

恩知承特達卽參樞幄躋鼎台魏公一沮子瞻罷僅邀
記注登西臺昌言果能報家國亦足藉展公夙懷奈何
縱飲厄奇疾舌本僵溼身枯骸浩然投効不復返歸卧
藏園閉蒼苔我年十八謁公始以詩執贄求鑒裁公發
其病進藥石授以杜法俾脫胎從此譚藝獲精進敢忘
時雨生枯荄公歸道山今四紀萬古生面誰重開蘇黃

以後遺山死更五百年無此才嗚呼更五百年無此才

讀黃仲則詩書後

天下幾人學太白黃子仲則今仙才其才挺脫實天授
獨以元氣爲往來有時造意入微妙游絲裊空影遲徊
有時揮毫極雄宕神龍出海隨風雷序事矯變不可測
抒情宛轉難爲懷傲骨千尋聳孤柏冷艷一枝橫老梅
飄飄凌雲有逸氣亭亭似月無纖埃惟其結體盡高妙
遂能彈指成樓臺花天雪地恣游戲零縑賸楮俱瓊瑰
黃山奇秀太華敵松石出沒雲濤堆君造天都俯人海
峯三十六羅嬰孩謫仙酒樓跨霄漢其人與地雙崔嵬

君倚危闌發高唱歌聲怒挾江聲迴余忠宣墓獨憑弔
詩成擲筆何雄哉一句一轉一意換五花八門生面開
我讀此詩首至地謂君飛將誰能摧其才如此窮且天
海內才人死灰平生知己數公最朱竹君先生王述菴先生翁
覃溪先生同栽培我時入燕君赴晉當年恨未相追
陪或論君詩以我匹心實愧赧佯歡吟疲駑妄想躡天
駟力旣竭矣今衰頹昨病卽死亦中壽念君數奇尤可
哀行將所作付梨棗從人覆瓿供談諧終期與君結仙
侶驂鸞一笑傾千杯

建威將軍歌爲壯烈伯李忠毅公作

大星如斗墮炎海李將軍死天慘昏其身死戰神不死
終殲逆賊酬

主恩將軍毀家爲謀國自製軍械給軍食一門子弟盡
驍騰心甘蹈海氣吞賊安南夷艇初入閩防海將弁多
逡巡將軍伏兵伺賊出飛礮中之如有神五年大入浙
滋擾將軍領師扼其要台州酣戰逼松門天助颶風覆
夷盜旌旗五色號令新賞罰必信士氣振鯨浪漸消外
擾靖鳳尾蟻賊來紛紛是時蔡牽稱盜首鉅萬逋逃羣
淵藪陰購民米劫商船豕突鴟張無不有將軍曰噫某
在斯么麼何者猶猖披誓搜汝族傾汝穴生啖汝肉寢

汝皮一戰白犬洋再戰青龍港將軍所向靡不摧鄭一
朱潰散其黨賊牽勢蹙奔三沙如魚游釜兔入罟將軍
滅此且朝食坐聽歡聲騰鼓笳大府何人飛羽檄趣令
將軍退堅壁詐降修備賊遠颺帳下健兒皆掩泣牽也
再出圍臺灣鹿耳阻塞陷鳳山將軍出奇遶賊背夾攻
連破開重關乘潮賊竄機又失天意蒼茫苦難必漁山
之役箭雨集將軍被創戰逾急大星嶼前燒賊舟我舟
亦復摧中流粵援不至兵力竭事嗟掣肘功難收將軍
行與家人別曰賊不除吾永訣二鎮兵合黑水洋賊膽
三舟趨險絕將軍乘勝以火攻牽命已在呼吸中海水

忽立天怒風將軍殉國成孤忠左手持刀右握盾魄力

已盡猶爭雄請于上帝泄冤憤明年部將收其功

提督王公

得祿邱公良功

嗚呼將軍生平五十有八耳死得其所

死非死百戰威名草木知千秋大節河山偉平生特達

受

知深獨恨封圻未一心賴有兩賢能協力

巡撫阮公元清公安泰

遂令羣盜屢成擒

天語當年誠持重愛惜臣身勿輕用臣身自惜賊誰殲

萬古臣心抒一慟易名拜爵崇專祠貞石義義

諭祭碑我交公子

襲伯

廷鈺詳遺事感激爲公賦此詩

澈翁詩

吾生有本性如明月在水卽在污泥中不改澄明理奈何自擾之遂使無定光甘爲糞土濁復肆波瀾狂嗚呼此明月何嘗損其舊但令還靜觀依然無點垢豈惟點垢無萬象涵其中竹柏卧清影樓臺銜遠空此月在吾心一輪常皎潔世事如雲煙蔽之昏欲滅吾於病訣後了此生死緣回心向初地湛寂見諸天乃以澈名翁反觀殊自在外物毋再侵始終無罣礙

與徐星伯舍人譚伊犁舊事感賦

徐子論學有根柢餘事亦復工詞章巍科早登意氣盛

出持文柄臨湖湘搜求積弊務除盡眾怨所歸騰謗傷

吏議一罍罪難白隻身萬里投窮荒冰山險絕一梯度

其聲坼裂如絲簣

洪稚存嘗謂余夜度冰山親聞絲竹之聲君言乃冰之坼裂者耳

飛

蛇蜿蜒氣含毒人馬中之多立僵君時荷戟徑深入安

得計及身存亡將軍

謂松湖浦先生

折節能下士延之入幕休

戎裝奏議箋書借籌筆酒酣落墨神飛揚雪花五月大

於席花開芍藥翻奇香天山絕頂有遺碣君往搨之苔

老蒼烏蘭嶺下拜雙烈班鄂大節扶臣綱此地古人未

親涉風俗地理安能詳君於暇時恣考核一一著錄收

奚囊謫居六載念歸切倚閭慈鬢憂成霜金雞詔下荷

恩貸玉關生入臣逾望將軍以君纂圖志奏呈

乙覽陳天閫

九重鑒定付梨棗俾入西掖參鵷行與我直廬共簪筆
紫薇花下容迴翔追思往事如斷夢至今感涕猶霑裳
當時一病已瀕死誤傳噩耗聞高堂全家痛哭盼歸骨
親舊勸慰增傍徨詎知飛札落天外平安一紙千金償
浮生百年亦易盡與君此味同先嘗我死六度復幸脫
老身雖在如斜陽浮雲世態日千變孤心湛寂生寒光
閉關從此世緣斷人間萬事皆粃糠學道雖遲敢自棄
朝聞夕死嗟何妨

蘭雪篇

有序

余少讀太白詩有句云獨立天地間清風灑蘭
雪因以爲別字今張介侯大令來言四川屏山
縣蘭花雪後大開始知空谷之姿雖在歲寒亦
能吐氣但須得其地耳因賦此詩以寄吾意

少年愛讀太白詩乃以蘭雪爲別字清風徧灑天地間
獨立何人知此意南雅爲我畫作圖但領其趣理則無
誰知異境故有在幽芬應候遲榮敷介侯爲我談往事
曾向屏山作仙吏嚴冬大雪滿深山山裏芳蘭爭吐氣
遣人移劬動千叢徧植衙齋盆盎中全家日住眾香國

妙比梅花更不同病窗兀坐方淒絕聞此心魂頓超越
徑思著翅飛入山飽嗅寒花嚼香雪始知造化有神功
得地依然道不窮詩骨平生能耐冷讓渠桃李媚春風
自題所藏王元章梅花真蹟直幅

畫梅自古多高士聊借寒花寫吾意疎花冷蕊亦丰神
終讓繁枝有奇氣煮石山農天下才獻策曾上黃金臺
經世苦心無用處入市佯狂亦可哀平生畫梅多巨幅
虬枝鐵幹交蟠曲細尋一一有根源不是狂花無檢束
酒酣放筆寫春風十指縱橫妙不窮憑將萬點燕支雪
亂灑荒山破屋中頭着高簷帽身被綠蓑衣手持木劍

向誰斫車駕白牛迎母歸九里山中結茅地花開花落
無人記自嗟身世若浮萍投老鑑湖恣游戲一生畫梅
知幾多求之不得當奈何當其得意揮毫日村店寺樓
皆滿壁身後一紙千金值只許高人能辨識真蹟懸來
屏障間紅羅玉照無顏色吳生有梅癖看花常縱游桐
江種花卅萬樹移宅來居九里洲爲愛公家山九里願
藏此幅共千秋

陳秋舫修撰石士庶子以余病後作詩太多苦言
規戒感而賦此

兩君愛我深休戚念殊摯見我病瀕死屢以足頓地俄

聞猛劑投憂疑不能寐知我死復蘇一笑方破涕晨夕
或暫睽問訊日頻至祝我慎起居飲食嚴節制百密有
一疎前功懼難繼觀我病後詩一字三慨喟謂我放言
中滂沱萬古淚勸我須少作大恐雕肝肺靜養且十旬
庶以資攝衛嗟我體雖孱胸中鬱奇氣賴此陶寫之聊
用滌邪穢我生太紛擾頗以多情累經此大創懲百苦
靡弗備自分當永訣預敕身後事再生亦偶然苟延知
幾歲名醫縱咫尺何敢遽深恃惟於沉痛餘航此寂寞
味飲冰道念萌嚼蠟世緣棄其心久泊然殆若井將廢
寒泉湛虛光生此定中慧日長但高卧初無作詩意有

觸篇卽成不假思力費生平無寸長寄託祇文字昨幾
溝壑填詎遭鬼神忌終當掃一切清修求密諦妙參不
二禪當獲大三昧伏枕念疇昔如夢復如醉積咎豈不
多或可銷懺悔苦語卽良藥一一須默記感君進良箴
賦此志吾愧

授經圖爲汪孟慈農部作

父爲名父子名子儒林之傳合青史少孤追寫授經圖
中壘家風誰及此容甫先生今大儒學求根柢論不膚
義理精研考据核百家貫串皆膏腴同時豈乏傳經彥
餘事文章難並擅先生獨抱挾天才班馬香兼屈宋豔

卽以詩論亦可傳淨洗箏笛調朱絃黃生

仲疇昔競酬

和思力乃復能差肩公子失怙方九齡已通訓詁掩羣
經辛苦年來授書地身圍萬卷一燈青乾蔭早傾庭誥
絕手澤摩挲重嗚咽述學初鋟內外篇字字先生心上
血我游邗上歲屢更如何交臂失先生幸與郎君同講
藝竊聞緒論總菁英此圖畫者屠琴塢筆意蒼然託毫
素似聽書聲出樹間忘是竹西歌吹處我讀此畫一霑
襟夢我久廢忍重吟楹書雖在飽塵蠹孤負當年課子
心

朱椒堂同年由給諫遷順天府丞賦贈

君在部曹無曠事君居臺諫有直聲爲閤倉儲發其弊
天子俯鑒君精誠卓子海去秉濟陽節俾君造士持冰
衡君爲講習若家塾文字甲乙皆虛平行看培養徧寒
畷卽儲楨幹爲公卿昨臨病榻握吾手強言慰藉心忤
忤旣死復蘇荷神貺小飲招君哀喜并君以耿介受
殊擢

國恩旣重身先輕當求實用務匡濟大展所學酬平生
不然世且伺君隙未免門戶相軋傾吾儕立身有本末
區區所計非枯榮終期苦心救時難益勵晚節全公訐
我雖衰疾幸無恙草堂或可煩經營願君功業繼韓范

殊勝千秋著述名

李鐵君盤陰八景圖爲牛小竹作

洵水出盤山酈注資考證外骨中乃膚三盤萃奇勝其上多古松插天有餘勁卧者爲蒼龍山穿力猶橫其中多怪石雲根削嶽崙拗怒不可馴熊虎爭抱持下有百道泉觸石氣逾壯捲雨注寒谿奔雷裂層嶂幽棲溯前哲後漢稱田疇又云齊田盤結茅此淹留近代李鐵君鴻才秉高節詩格如其人肝肺皆冰雪繼起當有人來賦招隱篇飲水而餐花逍遙爲散仙君今出此圖能述鐵君事雲卧四十年柴門掩空翠君家有墓田卽近所

居地讀書依丙舍搜碑徧荒寺別山旣云久人海嗟萍蓬蓮花與松棧卧游邀我同老夫亦好奇所游兼曠奧三登岱嶽巔一艤匡廬權茲山失交臂猿鶴且騰笑誓將裏糧去十日窮躋攀行吟萬松裏暝坐泉石間詩成此爲券未用嘲緣慳

題少司農顧晴芬先生水竹柴門圖

有序

先生性好竹家無錫城西與太湖近其先世居涇上塋墓在九龍峯之陰柯山翼之中爲河莊俱有林泉之勝久宦京朝欲歸營舊業不得屬友人爲作圖而自記之以余夙有同好屬賦此

詩

水竹隨地佳何爲愛江南江南公故鄉土厚泉復甘居
瀕太湖尾一碧萬頃涵良辰理輕權往往窮幽探公性
最澹泊世味非所諳篤好惟此君對之如晤談年年值
夏五醉以日十三坐卧愛其影烟月同清酣

公家本世胄先後著名德講學傳宗風高文繼華國舊
居在涇上其地近城北迴谿通小橋疎籬映寒碧門外
多水田稻花被阡陌老圃春風香蝴蝶吹五色公懷本
源思重以栽培力雷雨迸龍孫低徊念先澤

側聞九龍峯其麓有佳兆柯山及河莊白雲自迴遶水

暖鷗拍拍沙淨魚了了粉香抽露筠翠陰亂風篠人家
在田間炊烟出林杪雞犬聲相聞桑麻事無擾公昔賦
閒居奉親願終老誰知丙舍田今樹龍岡表

公髮今已白立朝三十年門下玉筍枝手種皆參天
國恩苦未報豈容遂歸田柴扉定何處烟波徒渺然嗟
我非箇材愧賞柯亭椽愛竹乃同癖栽滿窗西偏公歸
儻有期從遊我最先未買桐江屋且刺蓉湖船

丁烈女詩

生者不可死天何奪我胡氏子妾身未歸心已歸負義
偷生不如死死者不可生丁氏之女格以誠籲天不得

以身代代者竟死死者生生死之權操自我騰天入淵
無不可萬靈呵護二豎迴至性所結生奇才愚忠愚孝
古來有遭遇如今天獨厚一池香水女所家萬劫開作
青蓮花

伯昂編修爲星伯舍人作隸書復畫紅梅數枝於
後星伯屬題

伯昂畫梅參隸法其筆蒼然可迴鐵我詩瘦硬亦通神
星伯見之詫三絕平生傲骨梅花同耐得高寒守固窮
忽添數點嘖山雪也似衰顏借酒紅

六月十二日黃山谷先生誕辰因憶去年是日李

蘭卿侍讀以先生騎牛石像爲供補作一詩

先生昔游石牛洞山谷之名自茲重
皖公山色過江青
照公鬚髮猶生動少年曾製牧牛詞
疑聞笛聲過烟隴
中年亦詠牛礪角毋令竹枝擯森聳
平生大節埋窮荒
奇句驚人獨傳誦浯溪感賦中興碑
我讀其詩心骨痛
年年筍脯拜生辰見公生氣如騰湧
牛兮牛兮若有知
當亦長鳴謝矜寵

題信貞婦高柳鳴蟬畫扇

姓聞名瑾
懷江都人

貞婦抱苦節豈欲以畫傳嗣子繼夫死孤孫仍棄捐毀
家出憂患鬻藝供粥餽遂以冰蘂味結茲翰墨緣畫扇

豈有託高柳飄殘蟬風露不能飽嗚咽惟自憐汪子甫
爲表章老筆青霞竊我來覩遺跡吟苦咎哀絃婦李亦
能畫牘楮埋松烟畫徵誰補錄彤管應同編

廬陵王孝子詩哲嗣霞九侍御屬賦

母疾爲吮疽父病以身代兒身父母身敢嗟心力憊兒
命不足惜天意難屢迴失怙復失恃誰喻兒苦哀荒荒
三尺墳慘慘一椽屋雷雨撼中宵兒繞墓門哭腥風忽
偃樹饑虎來攫人兒哭虎睨視泣下氣愈馴亦有穿窬
者誤竊耕山客青氈不可求聞言增太息墓側有桐杖
久矣成枯枝秋冬條萌芽森若初種時山中故無井是

歲尤苦旱一泉破空出可漱亦可澣天地何所私動植
詎有情異族乃相感惻怛由至誠親訓無暫忘親心無
弗體修譜且修祠先靈斯慰矣輸課力難繼涉川路苦
遙乃成公裕會乃建元昌橋是皆推孝思其人能錫類
遂以胞與懷積此中和氣上爲朝廷瑞下爲閭里光
孝子今有子志節兼文章

載書圖爲盧容莽學士作

漢書一卷黃牛背李密行歌氣英邁唐書兩部紅燭圍
宋祁史才天下稀富貴賤貧渾不計始信讀書有真味
不見巡漕使者盧隨身惟有盈車書

讀書之功如濬泉沿流一一窮其源濟水揚瀾入河海
七十二泉眾流匯先生河上乎翱翔飛芻五省馳風檣
細帙圍身綠篷底書聲琅琅答流水

讀書之妙如遊山萬峯絕頂窮躋攀泰山一登天下小
齊魯果然青未了先生振衣日觀峯金烏夜騰滄海東
聖門之學誰造極把卷踟躕看山色

先生著書昔滿家還朝今載書連車十萬籤應藏李泌

三十乘豈矜張華哲昆所郵脫朝士

令弟來庵爲阮雲臺先生校刊十三

經注疏持以寄君俾得分貺京師同好

藝林先後分嘉惠手鈔何事貶巾

箱博覽居然擬中祕使節當時山左迴旋膺丹綬領

銀臺孔廟碑曾收勝蹟高談錄又鑄羣才

君督河南學政每舉湯文

正公嵩談錄以訓迪多士黃閣只今推大鳳

聖恩優渥聲華重平生大節兩封章

君近奏請以湯文正公從祀孔廟嘉

慶初又嘗疏請停緝林清餘黨以免株連皆蒙

俞允儒術由來兼體用四十年

來共苦吟可憐我亦號書淫蠹魚未食神仙字孤負窮經致用心

李潤堂勳伯自寫秋柯草堂圖

丹青不澹秋山色但寫修柯倚危石一鶴徘徊步夕陽
仰天清唳無人識芒鞋竹杖杳難尋脫葉蕭蕭風滿林
誰憐小李將軍筆偏有倪迂世外心

萬廉山太守寫寄九里梅花村舍圖

我藏元章畫梅卷樹偃蒼龍花古豔可惜不畫山居圖
烟巒縱好無人見山農昔居九里山看山終日掩柴關
爭似桐江洲九里千峯出沒萬花間廉翁知我有梅癖
爲愛探花來卜宅寫寄寒江夾岸花富春妙染青山色
我交廉翁四十年平生供養只雲烟才名政績自雙絕
買山卻笑歸無錢化工一旦出翁手林壑村莊無不有
白雲遶屋花連天種滿香田三百畝田路平臨江水流
風帆葉葉天盡頭踏雪每尋沽酒店看花常借釣魚舟
我別桐君今十載塵土淹留素心在畫裏先爲着小樓

夢中我已游香海結鄰有客住花南

謂鮑覺翁

君若能來共

一庵差勝東坡老居士徑因苦笋脫朝衫

趙松雪真書墨蹟王黃州待漏院記爲陳石士講

學作

吳興之書黃州文筆法晉唐詞典墳記曰待漏泐院壁
義規宰相惟匡君棘寺小吏善規諷何況身爲獻納臣
禦戎十策疏五事平生大節高嶙峋若行其志卽房魏
詎攀李絳偕崔羣惜哉直道每三黜猶以惠政蘇疲民
光堯異日想風槩睿藻所被光九原子昂握管涕淚紛
此書豈以姿媚論側想國家全盛日大賢輔政朝廷尊

黨籍禍烈和議繼持位苟祿徒踈踈王氣偏安山水窟
半閒相業蟋蟀盆厓山塊肉殉滄海鷗波翰墨哀王孫
作者先幾見獨早勸懲所著賢奸分南渡諸公能念此
未必宋室終沉淪姚公姬傳行高文亦醕鑑古得此希世
珍持贈弟子新城陳風期願與黃州親方今

天子聖且仁股肱所寄臯夔鄰調和元氣治理臻誰參
機重誰絲綸吾儕職業在文字上裨

雅化惟清真遭際萬一風與雲錄成金鑑論美芹手摹
此記宜書紳慎勿進退慙因循

題魏忠節公及其子孝烈先生遺像

天啟大權歸宦寺東林一網無噍類五彪五虎十孩兒
豈識人間忠孝字點將錄進誰先鋒兩魏爭排一魏公
封疆不貸熊廷弼詔獄甘隨楊大洪夜行晝伏檻車尾
父抱奇冤子從死耐葬殊恩三百年天以清門樹人紀
內閣家報胡爲乎廣徵遺臭良卿俱見泉地下應長慟
公有佳兒我獨無

縱節婦詩

縱氏之婦李氏女事夫九年殉夫死死也同日殮同棺
妾之初願豈如此縱郎未病耽讀書妾以女紅佐勤劬
書聲機聲斷續俱風雨一燈搖敝廬郎病漸深醫藥誤

床蓐廁牕手調護以身祈代人不知妾淚何曾有乾處
耶死妾何以生爲再拜舅姑從此辭堂上老矣下乏嗣
一死區區明妾志黃金之環妾已吞繡帶手製妾自焚
妾生徒益舅姑累妾死毋先父母聞將死未死命呼吸
家人救之環且泣佯謝守者出復入三尺朱繩掛於室
嘉慶丁丑十二月是日歲除前二日天地鑒觀鬼神集
嗚呼一死人所難烈婦再死心始安此心暫移死不得
萬古之名爭一息

和答南雅同年自題畫梅見贈

吾心有冰雪何地非孤山先生畫絕詩亦絕妙想不似

來人間澈翁隱於梅願家洲九里一擲嚴陵舊釣竿焚
遶花村十年矣斜街僦屋幸比鄰雪夕花朝過訪頻時
時探袖出佳紙乞君爲寫胸中春我藏煮石山農畫萬
朵千枝逞姿態君倣其意偶爲之放筆欲窮香世界此
幅忽擬逃禪翁寒花數點清若空人家籬落不可見只
在澹月疎烟中翁乎觀此三太息知君原自蓬萊謫早
春獨步天自全獨步早春自全其天宋賦中句也誰愛廣平心鐵石百
年身世感浮沉瘦策寬鞋何處尋開卷但聞花氣味始
知人海卽山林

得會賓谷中丞詩札寄謝

詩曰受病固有根每在壯盛時盛時不自惜病

至則已衰哀病恒苦多扁盧恒
苦少寄語吳澈翁能澈須能了

草木方榮華其根羣蠹集勞生當盛年百病每先入防
患須未然志士常隱憂毋令一蟻穴潰作江河流
先生學道久定力堅於鐵治國如良醫洞然見癥結積
弊豈不深廓之使漸清庶幾元氣復窮檐騰笑聲

萬事今已灰結夢惟名山平生多隱恫寄託文字間代
謀黎棗資未免損清俸一序慙過情論詩乃奇中

吾身如贅疣心固湛然在妄念苟一萌輒謂棺已蓋能
澈不能了殆與不徹同三復先生詩午夜聞霜鐘

雨後坐詩舫次韻荅桐村兼簡鳳岡前輩

小院似空谷一雨生秋心唱酬豈不多所得惟商音況
以露蛩語兼之風葉吟移情入杳冥何啻海上琴比鄰
有高閣可以睇遙岑斜陽一爲照積翠連城陰跬步阻
良覲坐惜青苔深

寄徐西礪秀才

幽人之宅瀕西湖吮毫妙得湖山氣鐵生

奚處士岡秋菽馬

常履泰

吾舊游可惜與君失交臂九里花開江上村乞君

爲我畫柴門扁舟異日能相訪繫纜還尋梅樹根

香蘇山館古體詩鈔卷十三終